

船山遺書

第廿一函
函六冊

和梅花百韻

船山遺書 集部

中華民國廿二年十二月
上海太平洋書店重校刊

劉陽 李英侯 總勘
劉陽 張告吾 輯校
平江 李蘊平

和梅花百詠詩目錄

古梅

早梅

庭梅

官梅

江梅

溪梅

嶺梅

野梅

憶梅

寢梅

尋梅

問梅

探梅

索梅

觀梅

賞梅

友梅

寄梅

評梅

歌梅

別梅

惜梅

折梅

翦梅

浴梅

浸梅

簪梅

妝梅

蟠梅

接梅

譜梅

苔梅

杏梅

蠟梅

竹梅

雪梅

月梅

風梅

煙梅

孤梅

移梅

疎梅

老梅

新梅

矮梅

遠梅

落梅

瘦梅

宮梅

簷梅

寒梅

咀梅

盆梅

紅粉

粉梅

青梅

黃梅

鹽梅

千葉梅

鴛鴦梅

綠萼梅

胭脂梅

西湖梅

東閣梅

清江梅

孤山梅

羅浮梅

漢宮梅

廨舍梅

書窗梅

琴屋梅

碁墅梅

釣灣梅

樵徑梅

僧舍梅

道院梅

柳營梅

蔬圃梅

茅舍梅

藥畦梅

前村梅

沼水梅

山中梅

城頭梅

水竹梅

水月梅

檐上梅

杖頭梅

隔簾梅

照鏡梅

十月梅

二月梅

未開梅

乍開梅

半開梅

全開梅

水墨梅

畫紅梅

玉笛梅

紙帳梅

追和王百穀梅花絕句十首

和梅花百詠詩

衡陽王夫之譔

上湘馮子振自號海粟當蒙古時以裨闔遊燕中干權貴蓋傾危之士也然頗以文字自緣飾亦或與釋中峰相往還曾和其梅花百詠中峰出世因緣爲禪林孤高者所不愜於馮將有臭味之合邪隆武丙戌湘詩人洪業嘉伯修龍孔蒸季霞歐陽淑予私和馮作各百首歐陽炫其英多倍之余薄遊上湘三子脫藁一卽相示並邀余共綴其詞旣已薄其所自出而命題又多不雅馴懼爲通人所鄙戲作桃花絕句數十首抵之以示鄭重未幾三子相繼隕折庚寅夏昔同遊者江陵李之芳廣生相見於蒼梧與洒山陽之涕李侯見謂君不忘浮湘亭上盍尋百梅之約爲延陵劍邪余感其言將次成之會攸縣一狂人亦作百梅惡詩一帙冒余名爲序金谿執爲豐端將構大獄擠余於死不期暗香疎影中作此惡夢因復敗人吟興抵今又十五年矣今歲人日得季霞伯兄簡卿寄到伯修元藁潛然讀

已以示歐子直子直欣然屬和仍從史老漢爲前驅祓道時方重定讀書
說良不暇及乃懷昔耿耿且思以挂劍三子者挂劍廣生遂乘鐙下兩夕
了之湘三子所和舊用馮韻以其落字多腐又做流俗上馬跌法故雖仍
其題而自用韻亦以著余自和三子非和馮也乙巳補天穿日茱萸塘記

古梅

早歲先登秦女峰腰垂綠髮玉爲容不知甲子真多少問取前溪偃蓋松

早梅

不遣西園久放閑微陽烘蒂坼朱殷南征鴈過驚春色睥睨寒汀擬北還

庭梅

素錦光搖玉篆牌瞳朧清影正當堦畫垣底事重重閉未有塵飛走馬街

官梅

碧幹扶疎閒古槐晨衙畫鼓隔簷催迎春初進纏紅仗一日儉閑得看來

江梅

橫梢浙瀝入船牕低映棠橈亂雪淙鴈盡天南人未返憎他帶影一雙雙

溪梅

香霧氤氳靄碧灣流漸一夜送潺湲低垂亂惹珠光濺疑是疑非響珮環

嶺梅

藏春有塢貯輕融直上千尋故御風平甸下看煙漠漠孤擎寶露出清空

野梅

牧笛無心倚玉簫青帘得意遠蘭橈生憎殺景張功甫浪與移栽向六橋

憶梅

先春不得待春闌渺渺西洲欲見難唯有梨花賒賸粉黃昏煙雨帶人看

夢梅

湘簾凝涼菡萏開幽香冷觸幻春回因緣漫向癡人說只作當先及第猜

尋梅

消息心知在別峰南參煙水尙重重谿雲乍捲流泉細一點香飄帶影逢

問梅

不是桃源惘去津知開知落也難真南鄰酒伴經旬飲欲與商量恐過春

探梅

扳枝已見綠催新斂萼猶疑粉未勻子夜霜鷄驚曉起逢迎不早怕花瞋

索梅

樓頭遙望識春生雪徑過從柰宿醒聞說凍禽爭採啄何妨分我一杯羹

宋用朱子南岳詩

觀梅

脈脈從看爲解頤陽和一繭細抽絲捐情似水容相見不許香車寶馬窺

賞梅

徵詩檄就隔林催鶴膝猩氎渡水來婪尾不須傾臘酒巵頭還有煮青醅

友梅

爲之說耳
亡實也

大夫已見受秦封君子還驚化鶴容獨抱冰心邀瑞葉溪頭三笑一相逢

寄梅

紅塵日日促香乾欲贈相思行路難知到隴頭春已盡祇應將作柳枝看
評梅

絕色平分雪幾曾清香不怕月難勝雙標第一花卿品莫遣姚黃妬汝能

歌梅

乍炙銀笙試朔吹旋拋珠串賽清姿曉風殘月傷心句不待楊花撲岸時

別梅

離筵及早酌屠蘇畱看鐙宵待得無知有前期霜信後小牕人柰雪侵鬢

惜梅

情知無計柰春何水涘山椒玉一波密篠殘陰香幾瓣還愁微霰祝暄和

折梅

躡蘚牆東帶笑披暄風還向手中吹閒情貪授尋春客不管高枝怨別離

翦梅

當窗妨繡鳳頭鞦出閣驚捎小燕釵拚取惜花情幾許并刀一割玉龍乖

浴梅

臺上天花白氎巾戒香臘日洗塵塵寒崖莫有三冬暝爲現瞿曇四月身

浸梅

清泉細點石硫黃畱得荀公幾日香蠟蒂涓涓升宿潤猶疑疎雨過銀塘

簪梅

宜春燕子縷金花拋擲偏拈紫玉芽風味愛他林下好妝成掬雪試烹茶

妝梅

低回怕得近簾鉤寶髻當心五瓣收萼綠華傳新樣子吳娃錯道牡丹頭

蟠梅

藤梢蔓惹怕清狂收拾閑心寸步香向日迎風千笑合來回無影過東牆

接梅

裁素紉紅半臂嵌縫成知費手摻摻新恩特賜加緋服仍帶銀魚舊日銜

譜梅

鄉國原標大庾南飄零偶籍百花潭宗支的的吳門隱指李荒唐笑老聃

苔梅

紫葆初含故葉稀孤莖獨秀綠茸肥晴雲潤浥虬枝輒倒寫溪光碧玉圍

杏梅

薄袂圓襟一式裁駸駸旋接落英開便娟爲少新條綠遙向日邊掠彩來

蠟梅

弱粉難支雪色侵檀痕相倚賴知音連牀各夢還同調凍蝶迷香記淺深

竹梅

斌媚檀欒共一時鴨頭新浴鷺飄絲長疑臙粉歸何處密裏龍孫出籜枝

雪梅

減取花瓊一片開五銖輕較六銖裁亭亭小立雕楹外白紵閑看舞袖迴

月梅

輕梢無葉出空微弱片多驚定影非碧海朧朧煙似水清暉略帶一分肥

風梅

雲痕乍裂鼻孤煙薄媚東君試一暄背水獨搖香陣陣芳心透過柳枝邊

煙梅

一片芳情悄自拘未分明處不模糊憑誰洗滌幽香魄爲倩繇山縞臆烏

孤梅

空明碧瀆粉離離寒鵲尋香遠不迷野渡問津人共指重來猶記折殘枝

移梅

傲歡得向玉堂栽油帟朱闌碧甃臺斷岸當年生長地春雲如絮野棠開

疎梅

暮雨蕭蕭夢幾忘晨星落落意爭狂從教子結調羹用不倚多金傲洛陽

老梅

天涯遲暮歲寒心淺著鉛華遠罩陰消渴文園相待久黃金爲買白頭吟

新梅

試雨禁風始出胎根苗忘盡舊亭臺
倡條冶葉輕前輩庾信江南老自哀

矮梅

舞衣不浪費冰綃仰笑垂楊銜楚腰
羅幃風生驚鷗起旋看緣帶上頭嬌

遠梅

鄰院新栽葉未滋牕前無分慰相思
逢人把過石橋去借問攀從曉露時

落梅

乍暝初催朵朵齊蛟冰風捲畫樓西
琉璃國土堪埋玉不遣餘香上燕泥

瘦梅

斷岍欹危罨古藤紅泉瑞露飽何曾
清羸百鳥銜來易將供日中一食僧

宮梅

玉鱗遍覆輭條青合殿金鋪盡日扃
唯有樓東人睡起鑪煙移遠水晶餅

簷梅

纖枝上與午煙齊墜玉旁依乳雀棲
冰湫夜懸三百顆雙邀斜月漾玻璃

寒梅

生緣同在涸陰天
栗烈何因授記偏
爲有臨風觀望客
遲遲春日攤黃綿

咀梅

聞說猶疑耳亦貪
終年不食更何堪
輕鬆脆軟清泉味
池底奪將雪藕甘

盆梅

平塘夢斷夕陽紅
曲檻容遮五夜風
一點春愁分不去
當堦斜睨錦熏籠

紅梅

對色疑非香不非
迎暄莫問素心違
光風灼灼傳新喜
殘雪全消散落暉

粉梅

從捐螺黛洗鴉黃金母
熏成姹女妝色壤爲鉛
難似此淩風九轉更欺霜

青梅

本咏梅花雜口梅
子非是姑從之

花事闌珊綠覆除
纍纍帶雨更愁余
濤箋藉染胭脂色
聊寄江南一紙書

黃梅